



UNIVERSITÄTS-
BIBLIOTHEK
PADERBORN

Universitätsbibliothek Paderborn

**In Evangelia: Qvæ Vsitato More in diebus Dominicis &
Festis proponuntur, Annotationes Philippi Melanth.**

Melanchthon, Philipp

Vuitebergæ, 1544

VD16 E 4532

Dominica II. Post Epiphania, Euangelium Ioan. 2.

urn:nbn:de:hbz:466:1-35272

guarum, sed id aiebant lectione & exercitatione.

Hec exempla nos quoq; hortentur ad intentionem & curam, & ad exercitationem in omnibus donis spiritualibus, hoc est, in studijs, & in coërcendis pravis cupiditatibus, in excitandis bonis motibus, in uocatione & alijs.

DOMINICA II POST EPIPHANIA, Euangelium Ioan. 2.

ET DIE TERTIA NVPTIAE factae sunt in Cana Galileae, & erat mater Iesu ibi. Vocatus est autem & Iesus & discipuli eius ad nuptias. Et deficiente uino, dicit mater Iesu ad eum, Vinum non habent. dicit ei Iesus: Quid mihi tecum est mulier? Nondum uenit hora mea. Dicit mater eius ministris. Quodcumq; dixerit uobis, facite. Erant autem ibi lapideae hydriae sex positae secundum purificationem Iudaeorum, capientes singulae metretas binas uel ternas.

Dicit ei Iesus: Implete hydrias aqua. Et impleuerunt eas usq; ad summum. Et dicit eis, haurite nunc, & ferte architricli-

F 5 no.

DOMINICA II.

no. Et tulerunt. Cum autem gustasset architriclinus aquam uinum factum, & non sciret, unde esset, ministri autem sciebant, qui hauserant aquam, uocat sponsum architriclinus, & dicit ei: Omnis homo primum bonum uinum ponit, & cū inebriati fuerint, tunc id, quod deterius est. Tu seruasti bonum uinum usque nunc.

Hoc fecit initium signorum Iesus in Cana Galileæ. & manifestauit gloriam suam, & crediderunt in eum discipuli eius.

Quatuor loci insignes sunt.

- I De coniugio, quod ornat sua approbatione Christus.
- II Consolatio necessaria in coniugio.
- III De inuocatione.
- IIII Allegoria ecclesiæ.

DE PRIMO.

NECESSE est hominibus proponi mandata dei de prohibitis libidinibus, & horribilissimis

lens

lem iram qua Deus precipue punit prohibitas libidines. Sicut inquit Paulus: Scortatores, adulteri &c. non possidebunt regnum dei. Item ad Ebraeos, de castitate. Sine hac nemo deum videbit. Item, Fornicatores & adulteros iudicabit deus.

Et poenae cogitentur in populo dei & inter gentes. Multae enim magnae clades, bella & vastationes ortae sunt ex libidinibus. Diluuij causa fuerunt libidines, post diluuium deletionis Sodomorum Numeri 25. cap. occisa **XXIIII.** millia propter supra. Postea fere tota tribus **Beniamin** deleta est, propter uiolatam sacerdotis uxorem. Item **David** dedit grauissimas poenas adulterij.

Historiae Gentium plurimae sunt. **Troia** euersa est. **Roma** reges expulsi. **Athenis** interfecti filij **Pisistrati**. **Philippus Macedo** interfectus est propter libidines. Perijt & **Alexander** inter uoluptates. **Lacedaemonij** deleti sunt, cum quidam stuprassent, filias hospitis, & postea interfecissent. **Thebanae** calamitates etiam dicuntur ortae propter raptum **Chrysiippi**. Et **Aristoteles** plurima exempla collegit in politicis, quibus admonet, mutatas esse respub. propter libidines. Et natura quo magis decrescit, eo fit inbecillior. Ideo remedium diuinitus propositum magnificandū et amandū est, et fugiendae causae turpitudinis.

Etsi autem magnum onus est liberi & uxor,

DOMINICA II.

ut dicitur: μεγάλη τυραννὶς ἀνδρὶ τέκνα ἢ γυναῖκα,
Et totum coniugium multiplicia habet impedimen-
ta, Et multas aerumnas Et misérias: tamen ordina-
tioní Dei parendum est. Non disputemus de suauita-
te huius generis uitæ: sed meminerimus esse necessa-
riū, propter mandatum dei, quia deus horribiliter
irascitur prohibitis libidinibus. Deinde cogitemus
quæ sit causa difficultatis, scilicet peccatū originis,
Et tyrannis Diaboli, qui auget calamitates. Et oppo-
namus consolationem.

SECUNDVS LOCVS,

De consolatione.

CVM difficultates coniugij sint pœna peccatū
originis, Et in his diabolus exerceat suam se-
uiciam: sciamus tamen deum non permittere
diabolo, ut ordinationem diuinam prorsus deleat,
sicut conatur. Adest igitur deus, Et conseruat coniu-
gium: Et ut ceteræ afflictiones in uita, ita maxime
coniugium sit pijs schola exercendæ fidei, inuocatio-
nis, confessionis, obedientiæ, dilectionis erga ceteros
homines, Et erga reipub. Quia coniugium implicat
homines negotijs, parentes cupiunt tradere posteris
ecclesiam Et reipub. Ideo multo magis afficiuntur
cura reipub. Et ecclesiæ quàm ceteri, qui nec libe-
ros, nec coniuges habent, nisi sint summi uiri, ut Chri-
stus, Elias, Paulus. Et est pietas intelligere, quod deus
ita

ita deuinxerit inter se homines, ut habeamus materiã exercendæ fidei, & dilectionis. Item pios opus ipsum generationis, de creatione admonet, & de præsentia dei, mirabiliter formantis foetum, impertientis uitam. Item, est immanis, qui non uult alteram partem generis humani conseruare.

His igitur, qui pie in matrimonio uersantur, hic promittitur consolatio, cum Christus donat uinum sponso, Id est, toto tempore coniugij adiuuat eos, depellit diabolum, à quo præcipue augentur ærumnæ conjugales.

Proponamus igitur nobis necessitatem & mandatum dei de coniugio. Item comminationes de peccatis libidinum, Cogitemus & consolationes coniugibus propositas, quod deus defendat suam ordinationem, quod Christus depellat diabolum, quod uelit coniugium esse scholam exercendæ fidei, inuocationis & dilectionis.

TERTIVS,

De inuocatione.

IN periculis, humano affectu cito liberari cupimus, sed interdum differtur auxilium, ut quasi reiecti uideamur, ibi discamus non deficere fide, etiã cum non statim exaudimur, sicut monet Christus in Parabola de iudice tarde uindicante. Eius rei hic proposita est imago. Maria petit autoritate materna,

DOMINICA II.

ut Filius uinum efficiat, sed ille reijcit matrem, uidelicet admonens eam, hæc mandata non pertinere ad maternum officium, & se non uelle ea que ad ipsius uocationem pertinent, gubernari adfectibus humanis. Et tamen postea facit, quod illa petiuerat. Discamus igitur in inuocatione utrunq; non defatigari, scilicet cum differtur auxilium, & expectare ac petere auxilium, quia Deus requirit utrunq;, obedientiam in afflictionibus, & inuocationem.

QUARTVS LOCVS,

Allegoria.

PICTURA est ecclesie, que celebrat nuptiale conuiuium, cum docet & confitetur euangelium. Et quia accedunt ingentes afflictiones & ingentia pericula, uidetur negligi à sponso, imò ipsa ecclesia cum inuocat uidetur reiecta esse, uidetur non exaudita. Sed tamen exauditur & tandem donatur optimum uinum.

DOMINICA TERTIA POST Epiphania, Euangelium Matth. 8.

CVM AVTEM DESCENDISSET de monte, secutæ sunt eum turbæ multæ, Et, ecce Leprosus ueniens adorabat

Leprosus.